

# KARMEL

X'GN. URTEA, 1960

EPAILLA-JORRAILLA

(LARREA-ZORNOTZA)

## Eleiz batzar nagusia

Eleizeak ba-dau bere Artzaiña, Aita Santua, gaur XXIII'garren Joan agurgarria. Jesukristoren ordezkari dala, Erroma'ko aulki garaian jarri zanetik, ba-ditu biotz barruan bere ardura ta kezka.

Ardura ta kezka orreitan bi, lenen Kristo'ren jarraile guztion batasuna, ta bigarren, kristau guztion Jainko-bizitza berogartsua.

Gizonen artean, ezta arrigarri, beti sortu izan dira eztabaidak; eta gizonez osotua dau ezker, Eleiz-altzoan be bai. Olan, eztabaida batzuk zirala-ta, bide erdian geratuak doguz, esate baterako, sortaldeko kristau asko; Kristoren jarraile, Aren fede ta siniskaiak, Aren agindu ta ikurtonak, baiña gauza bat ontzat ez artzen: Erroma'ko Aita Santu Kristoren ordezkaren esanera bizi nai ez. Origaitik, ba, gaurko Aita Santuak, Batzar andi baten bitartez, batasunera dei dagitse kristau sakabanatu guztioi.

Beste gaitz bat, Kristau asko ta asko, izenez bai, baiña izanez ez dira Kristoren benetako jarraile, kristau zintzo bateri dago-kion goi-bizitza ez daroelako. Munduko txepelkerietan —diru, nagusi-nai, atsegin—

goiraiño sarturik dabilta, ta olangoak ez dira Kristo'renak erdizka baiño; ardi galdu edo bidekatuen antzeko doguz. Zer egingo? Artaldetik bota? Baiña Kristok arima guztien alde ixuri eban bere odola Gurutzeko agean; guztiok nai gaitu zerurako. Bere ordezkarak be ortan jardun bear, nai-ta-ez. Ardi otz, txepel, biddan, koldarrak berotu, goizaletu, Kristo'ren egiazko jarraile egin. Or Aita Santuaren zer-egiña.

Gauza biok gogotan izanik, Batzar Nagusi bat egingo da: au da, Eleiz-batzar nagusia. Lendik be, gizaldiak zear, onako asko egin ditu Eleizeak. Oraingoa, onelangoetatik XXI'garrena izango da; Batikano'ko II'garrena. Gertaera andiak darabillez Erroma'n eta mundu guztian.

Guk be geure alegintxoia egin bear dogu; bai irakatsiz, bai otoitzaren bidez. KAR-MEL'ek, beraz, batzar onen inguru ta buruzko izpar, erabagi, irakatsi ta beste xeetasun urtenenak, pozarren argitara emongo ditu.

Bai ta otoitz bero bat irakurle guztieri eskatu be, Aita Santu agurgarriaren arnas andiko asmo ta lanak, Jainkoak oso-osoa onetsi ta bete dagizan.